

COMUNU DE USEDDUS

Provìntzia de Aristanis

ISTATUTU

# TITULU I

## PRINTZÌPIUS GENERALIS

### Art.1

#### Autonomia de su istatutu

1. Su Comunu de Usellus est un Enti Autonomu in s'ambitu de is printzìpius fissaus dae sa lei generali de sa Republica chi ndi determinant is funtzionis e de custu istatutu.
2. Sa comunidadi de Useddus est su impari de is personis chi, po ddui essi nascius, po tradizioni de sa famillia o po scioberu insoru, apretziant de ndi fai parti in virtudi de is acapiamentus de natura culturali, economica e sotzìali chi tenint cun su territòriu de Useddus e cun s'atera genti de sa Comunidadi.
3. Su Comunu de Useddus est un Enti Autonomu Territoriali chi rapresentat totus is interessus particularis de sa Comunidadi chi ddui funt in su territòriu suu, intèndiu comentu cussu chi portat baloris autonomus e originalis.
4. Cun riferimentu a is interessus de chi no tenit sa disponibilidadi, su Comunu tenit sa possa de esternatzioni e de rapresentantzia avatu organus allenus de aterus livellus de su Governu e de amministratzioni chi est atribuiu, po lei, sa possa de providi a sa soddisfatzioni de is pròpius.
5. Cun riferimentu, invecias a is interessus de chi tenit sa disponibilidadi, in cunformidadi a is printzìpius inditaus cun lei, su Comunu sboddiat is funtzionis normativas, de governu e de amministratzioni.
6. S'autogovernu de sa Comunidadi, cun riferimentu a is interessus chi is tzitadinus nant, renescit cun s'esercìtziu de is possas previdias e disciplinadas dae custu istatutu.
7. In s'ambitu de is leis de coordinamentu de sa finàntzia pùblica su Comunu tenit sa possa de determinai is pròpias risorsas finantziarias e de programmai s'usu suu.
8. Su Comunu de Useddus narat ca giai a su printzìpiu de disponibilidadi avatu is immigrau sena fai diferentzia de sessu, ratza, colori, religioni. Issu fai de totu, intra is pròpias disponibilidadis, po fai prus dignitosu su abarrai o sa firmada de piticas comunidadis e de genti a sola.
9. Su Comunu de Useddus narat ca giai a su printzìpiu de su paris de is diritus tra òminis e fèminas, e s'impenniat, a intru sa e possa sua e is pròpias funtzionis, a sartai is discriminatzionis avatu a is fèminas e a agiudai e poderai onnia forma de iniziativa puru allena, po ndi leai strobis chi, de fatu, non lassant fai sa rennescia de sa pari oportunidadi tra òminis e fèminas, cun sa promotzioni de "atzionis positivas". " Est po cussu ca, is organus collegialis de su Comunu, aici puru po is entis, aziendas e istituzionis chi dipendint de cussu, po assegurai sa pari oportunidadi tra òminis e fèminas, benit garantida sa rapresentantzia de totu amba dus is sessus.
10. Sa lingua sarda, in formas usadas, in manera communu, dae sa Comunidadi, a su paris de sa lingua italiana, est cunsiderada sa lingua de su Comunu, abarrendi in cumprèndiu ca is autus cun rilevantzia giuridica de s'ordinamentu istatali depint essi iscritus in lingua italiana.
11. Puru in atòbius collegialis de is organus de su comunu e de is organismus a su pròpiu collegialis, est liberu su fuèddai su sardu de sa comunidadi, abarrendi in cumprèndiu ca is verbalis insoru depint essi isterrius in lingua italiana, fata salva sa possibilidadi de alligai is iscritus totu intreus in sa lingua usada e iat depit essi comentu si siat alligada a pari a sa pròpia tradutzioni in italianu.
12. Su Comunu narat ca giai a su printzìpiu de solidariedadi avatu a is emigraus.

## Art.2

### Finalidadi

1. Su Comunu promovit su isvilupu e su progressu tzivili, sotzialis e economicu de sa pròpia comunidadi sighendi is baloris e is obietivus de sa Costitutzioni.
  2. Su Comunu sighidit s'agiudu e sa cooperatzioni cun totus i sugetus pùblicos e privaus, e promovit sa partetzipatzioni de is tzitadinus, de is fortzas sotzialis, economicas e sindacalis a s' amministratzioni.
  3. Su Comunu ispirat sa pròpia atzioni a custus criterius e printzìpius:
    - a) Su passai a in antis a iscuilibrius economicus, sotzialis e territorialis chi nci funtis in su logu e in sa comunidadi natzionali;
    - b) Sa promotzioni de sa funtzioni sotziali de s' iniziativa economica, pùblica e privada, puru cun su isvilupu de formas de associatzionismu economicu o de agiudu in pari;
    - c) S'agiudu a sa renescia de unu sistema globali e integrau de siguresa sotziali e de tutela ativa de sa personi fintzas cun s' opera de is organizzatzionis de bolontariau;
    - d) Sa tutela e s' isvilupu de is risorsas naturalis, ambientalis, istoricas e culturalis chi nci funt in su territòriu po garantiri a totus una mellus calidadi de sa vida;
    - e) Su torrai a scoberri e sa balorizzazioni de ateras formas de s' istoria de sa cultura de Useddus e de sa Sardigna;
    - f) Sa promotzioni isportiva de fai cun sa criatzioni de serbìtzius po su isport, a partiri de is impiantus e de sa tutela de sa saludi; su "isport po totus", intendiu – segundu sa definitzioni de su Consillu d'Europa – comentu a pratiga de atividadis isportivas, in totus is formas e ispressionis, chi faint de s' atividadi fisica ricreativa a sa prus arta cumpetizioni;
    - g) Su Comunu, in su cuadru totu in pari de is serbìtzius pùblicos chi apant po ogetu sa produtzioni de benis e atividadis po sa renescia de is finis sotzialis e deretas a promovi su isvilupu economicu e tzivili de is comunidadis sotzialis, providit a sa tutela e balorizzazioni de su beni culturali po mesu de is serbìtzius pùblicos de biblioteca, comentu serbìtziu chi non si ndi podit fai a mancu po:
      - 1) garantiri a totus is tzitadinus su diritu de beni a iscriri is informatzionis ponendi in atu su printzìpiu de sa trasparentzia de is cosas fatas;
      - 2) poni a dispositzioni de totus is testimoniantzias de is pensamentus de s' òmini;
      - 3) documentai, allogai e baloritzai sa regodu istoricu e su patrimoniu culturali de sa comunidadi.
- Su Comunu, poi is finalidadis de su serbìtziu pùbliku de biblioteca, promovit e ponit in atu a livellus difarentis formas e ainas de cooperatzioni in cuncòrdiu cun ateros Comunas, is Comunidadis Montanas e is Provìntzias, tenendi contu de is leis regionalis.
- h) Su Comunu, tenendi contu de sa pròpia disponibilitadi, promovit formas de sotzializzazioni de is becius, cun iniziativa culturalis;
  - i) Promovit iniziativa po torrai a fai traballai personis cun grais riscus de abarrai a solus, ponendiddus a traballai puru a oras, cun intèrbentus sotziu-assistentzialis fatus, po cantu est possibili, a intru a su nucleu famillari.

## Art. 3

### Territòriu e sedi comunali

1. Sa circoscrizione de su Comunu est costituída dae is biddas de Useddus e de Escovedu, istoricamenti reconotas de sa comunidadi.
2. Su territòriu de su Comunu s'isterrit po 35.10 kmq, cunfinat cun is Comunas de Albagiara, Villaverde, Biddaurbana, Mogoredda, Alas, Assolu e Bidda S. Antoni.

3. Su palatziu tzivicu, sedi comunali, est postu in sa bia Eleonora de Arborea a su numeru 58.
4. Is atòbius de is organus collegialis si faint su de prus in sa sedi comunali; custus podint essi fatu in logu difarenti in casu de apretu o po aterus abbisongius particularis.
5. A intru a su territòriu de su Comunu de Useddus no est pirmitiu, po cantu si tratat de is atribuzionis de su Comunu in matèria, s'insediamentu de centralis nuclearis, e nemancu su istatzionamentu, sa passada de ordinis de gherra nuclearis e a de arremasullia radioativa.

## Art. 4

### Istemma e istendardu

1. Su Comunu in autus e in sigillu si tzerriat cun su nomini de Useddus.
2. Su istemma de su Comunu est comenti est fatu in su Decretu de su Presidenti de sa Repubblica de su 29 de su mesi de idas de du 1995:  
ISTEMMA: partiu mesu truncau: in su PRIMU, de oru, a olia de birdi, cun truncu e sderrexinau a su naturali, frutau de ses, de nieddu; in su SEGUNDU, de rubiu, a sa daga de prata, gronnida de oru, posta a punteddu, cun sa punta faci a susu; in su TERZU, de asulu, a sa craba de prata, firma in su paris birdi. Ornamentus allenus de su Comunu.  
ISTENDARDU: pannu de biancu cun s'oru birdi, ornau meda meda de ricamus in prata, e càrrigau de su istemma nau a suba, cun s'iscrita posta in mesu in prata, chi porta su nomini de su Comunu. Is partis de metallu e is cordonis ant essi argentaus. S'asta istrantaxia at essi ammantada de velludu cun i caloris de su pannu, postus, unu avatu s'ateru, cun aciulus de prata postas a caragolu. In sa frecia at essi figurau su istemma de su Comunu e in su gambu iscritu su nomini. Crobata cun fetas de tres caloris nazionalis frangiaus de argentu.
3. In is cirimonias e in is ateras pùblicas festas nodias, e onni orta chi serbat a fai ufiziali su fai parti de s'Enti a una particulari iniziativa, su sindigu podit ordinai chi bengiat aparau su istendardu cun su istemma de su Comunu.
4. Sa giunta podit autorizai s'usu e su torrai a fai su istemma de su Comunu po iscopus no istituzionalis isceti anca ddui at unu interessu pùblicu.

## Art. 5

### Consillu Comunali de is piciocheddus

1. Su Comunu po podi garantiri su fai parti de is piciocheddus a sa vida de totus impari, podit promovi s'eletzioni de su Consillu Comunali de is Piciocheddus.
2. Su Consillu Comunali de is Piciocheddus tenit sa faina de deliberai in bia consultiva in custas matèrias: politica de s'ambienti, isport, tempus liberu, giogus, raportus cun s'associatzionismu, cultura e ispetàculus, istrutzioni pùblica, assistentzia a is piciocus e a is becius, raportus cun s'UNICEF.
3. Su modu po eligi e su funtzionamentu de su Consillu Comunali de is piciocheddus funt detzidius cun regulamentu fatu apostu.

## Art. 6

### Programatzioni e cooperatzioni

1. Su Comunu s'ghit is pròpias finalidadis cun is ainas de sa programatzioni, de sa publicidadi e de sa trasparentzia, aballorendisidda de s'agiudu de is formatziones sotzialis, economicas, sindacalis, isportivas e culturalis traballantis in su territòriu.
2. Su Comunu circat, in prus de totu, s'agiudu e sa coperatzioni cun is comunus bixinus, cun sa provìntzia de Aristanis, cun sa Regioni Sardigna e sa Comunitàdi Montana 17° de s'Arta Marmilla.

## TITULU II

### ORDINAMENTU ISTRUTURALI

#### Capudu I

#### Organus e atribuitziones insoru

## Art. 7

### Organus

1. Funt organus de su Comunu su Consillu Comunali, su Sìndigu, e sa Giunta e is cumpetènzias de dognunu funt detzideas dae sa lei e dae custu istatutu.
2. Su Consillu Comunali est organu de indiritzu e de controllu politicu e amministrativu.
3. Su Sìndigu est responsàbili de sa Amministratzioni e est su legali rapresentanti de su comunu; issu esercitat puru is funtziones de Ufitziali de Governu segundu is leis de su Istadu.
4. Sa giunta agiudat cun su sìndigu in su manixu amministrativu de su Comunu e sboddiat atividadis de proponimentu e de impellida avatu a su Consillu.

## Art. 8

### Delìberas de is organus collegialis

1. Is delìberas de is organus collegialis funt pigadas, de regula, cun votu craru; funt de pigai a iscrutiniu segretu, is delìberas chi pretocant personis, candu benit esercitada una facultadi discretzionali fata a suba s'apretziu de is calidadis sogetivas de una personi o a suba su valorizamentu de s'atzioni fata de custu.
2. S'istrutoria e sa documentatzioni de is propostas de is delìberas benint fatas po mesu de is responsàbilis de is Ufitzios; sa verbalizatzioni de is autus e de is setzidas de su Consillu e de sa Giunta est fata dae su segretàriu comunali, segundu su modu e s'acabbu detzidius dae su regulamentu po su funtzionamentu de su Consillu.

3. Su segretàriu comunali non partetzipat a is atòbiu candu s'agatat in un istadu de incompatibilidadi: in custu casu est postu a su postu suu, po su tempus chi abbisongiat, dae su chi fai parti de su Consillu o de sa Giunta nominau dae su presidenti, de norma su prus piticu de edadi.
4. Is verbalis de is setzidas funt firmaus dae su presidenti e dae su segretàriu.

## Art. 9

### Consillu Comunali

1. Su Consillu Comunali tenit autonomia organizativa e funtzionali e, rapresentendi sa comunidadi intrea, deliberat s'indiritzu politicu-amministrativu e esercitat su controllu a suba s'aplicatzioni sua.
2. S'eletzioni, sa durada in càrriga, su de comenti est fatu e su scuai de su Consillu Comunali funt regulaus dae sa lei.
3. Su Consillu Comunali esercitat sa potestadi e is cumpetènzias istabilidas de sa lei e de su istatutu e sboddiat is pròpias atribuzionis cunformendisidda a is printzìpius, a su modu e a is protzeduras detzidas in custu istatutu e in is normas regulamentaris.
4. Su Consillu Comunali definit is indiritzus po sa nomina e su scioberu de is rapresentantis de su Comunu avatu entis, aziendas e istituzionis, e providit a sa nomina de is pròpius candu sa lei ddu previdit. Custus indiritzus balint isceti po cantu durat su mandau politicu-amministrativu de s'organu consillari.
5. Su Consillu Comunali cunformat s'atzioni totu impari de s'enti a is printzìpius de sa publicidadi, trasparentzia, e legalidadi po assegurai su giustu e su manixu amministrativu curregiu.
6. In is autus fundamentalis de su Consillu ddui depint capi s'individuatzioni de is obietuvus de s'ghiri e puru su modu de agatai e de destinai is risorsas e is ainas chi serbint.
7. Su Consillu Comunali ispirat sa pròpia atzioni a su printzìpiu de solidariedadi.

## Art. 10

### Sessionis e cunvocatzioni

1. S'atividadi de su Consillu Comunali si sboddiat in sessioni ordinaria o istraordinaria.
2. Sa cunvocatzioni de su Consillu e s'ordini de sa dì de is cosas de chistionai est fata de su sindigu de pròpia iniziativa o cun sa pregunta de a su mancu unu cuntu de is consilleris; in custu casu s'atòbiu depit essi fatu intra de is binti diis e depint essi postus in s'ordini de sa dì de is chistionis propostas, bastit chi siat de cumpetènzia de su consillu.
3. Is setzidas de su Consillu funt pùblicas, foras de is casus prividius dae su regulamentu consillari chi ndi disciplinat su funtzionamentu.
4. Sa prima cunvocatzioni de su Consillu Comunali luegu in fatu a is eletzionis po su renou suu, benit indicia dae su sindigu intru is dèxi diis de su programu de is eligius e s'atòbiu depit essi fatu intru is dèxi diis de sa cunvocatzioni.

5. in casu de istrobbu chi abarrat, po decadentzia, rimotzioni, morti de su s'indigu, s'andat a in antis a su scuai su consillu comunali; su consillu e sa giunta abarrant in càrriga fintzas a sa dì de is eletzionis e is funtzionis de su s'indigu funt sboddiadas dae su vices'indigu.

## Art. 11

### Lineas programaticas de su mandau

1. Intru de is noranta diis, a partiri dae sa dì de s'insediamentu suu cuntessiu, funt amostadas, dae parti de su s'indigu, ascurtada sa giunta, is lineas programaticas chi pretocant is atzionis e is progetus de fai in totu cantu andat su mandau politicu-aministrativu.
2. Donnia consilleri comunali tenit totu su diritu de interbeniri in sa definitzioni de is lineas programaticas, proponendi integratzionis, adequamentus e cambiamentus, cun sa presentazioni de emendamentus fatus a posta, a manera inditada dae su regulamentu de su consillu comunali.
3. A su mancu una borta a s'annu, su Consillu providit, in sessioni istraordinaria, a controllai s'atuatzioni de cussas lineas, dae parti de su s'indigu e de is pròpius assessoris, intru de su 30 de su mesi de idas de onnia annu. Est scioberu de su Consillu providiri a aciungi, in totu cantu andat su mandau, adequamentus struturalis e/opuru cambiamentus, is lineas programaticas, a suba is abbisongius e is problematicas chi nci iant podi essi in s'ambitu locali.
4. A s'acabu de su mandau politicu-aministrativu, su s'indigu amostat a s'organu consillari su documentu de torracontu de su istadu de atuatzioni e de renescia de is lineas programaticas. Custu documentu depit essi aprovau dae su consillu, apustis ai fatu s'esamini de su gradu de renescia de is intèrbentus prividius.

## Art. 12

### Cummissionis

1. Su consillu comunali at podit institui, cun delibera fata a posta, cummissionis po sempiri, po pagu tempus, opuru ispetzialis a iscopu de controllu, de ispetzioni, de inchesta, de istùdiu. Custas cummissionis funt fatas isceti de consillaris comunali, cun criteriu proportzionali. Po cantu regardat is cummissionis cun funtzionis de controllu e de garantia, sa presidèntzia est donada a is consillaris chi faint parti de s'oposizioni.
2. Su funtzionamentu, su de comentis est fatu, is possas, s'ogetu, e sa durada de is cummissionis ant essi disciplinadas cun regulamentu fatu a posta.
3. Sa delibera de istituzioni depit essi pigada cun sa maggiorantzia assoluta de su chi faint parti de su consillu.

## Art. 13

### Consillaris

1. Su istadu giuridicu, is dimissionis e su cambiamentu de is consillaris funt regulaus dae sa lei; issus rapresentant totus sa comunidadi a sa cali depint respondi cun costantzia.
2. Is funtzionis de consillari mannu, funt esercitadas dae su consillari chi, in s'eletzioni po custa càrriga, at pigau su numeru prus mannu de preferenzias. A paris de votus funt esercitadas dae su prus mannu d'edadi.
3. Is consillaris comunali, chi non faint parti de sa sessione po tres bortas paris sena motivu giustificau, funt decraus arrutus de su incàrrigu cun delibera de su consillu comunali. Po cussu, su s'indigu apustis s'atziertamentu cuntessiu de is ausentzias cumpridas dae parti de su

consillieri interessau, providit cun comuncau iscritu, segundu s'art. 7 de sa lei 7 austu 1990 n°241, a ddi fai iscriri de s'inghitzu de su protzedimentu amministrativu. Su consillieri podit scioberai de fai balli is motivus iscusaus de is bortas chi est mancau, e fintzas fruniri a su sindigu eventualis documentus chi amostant sa beridadi, intru de su tempus inditau in su comunicau iscritu, chi, comenti si siat, non podit essi prus pagu de binti diis a partiri dae sa di chi dd'at arriciu. Passada s'urtima di, su consillu esaminat e a sa fini deliberat, tentu contu in modu adequau de is motivus iscusaus amostaus dae su consillieri interessau.

## Art. 14

### Diritus e doveris de is consillieris

1. Is consillieris tenit diritu de presentai interrogatzionis, interpellantzias, motzionis, e propositas de delibera.
2. Sa manera e is formas de esercitziu de su diritu de iniziativa e de controllu de is consillieris comunalis funt disciplinaus dae su regulamentu de su consillu comunali.
3. Is consillieris comunalis tenint diritu de teni dae is ufizius de su comunu, aici puru dae is aziendas, istituzionis o entis dipendentis, totus is novas e informatzionis chi serbint a su sboddicamentu de su pròpiu mandau. Issus, intra is limitis e cun is formas istabilidas dae su regulamentu, tenint diritu de pigai visura de is autus e documentus, fintzas cussus preparatorius e de connosci onnia ateru autu usau po s'atividadi amministrativa e funt obrigaus a non iscoviai in is casus naus in manera specifica dae sa lei. In prus issus tenint diritu de teni, dae parti de su sindigu, una adequada e preventiva informatzioni a suba is chistionis speculitadas dae s'organu, puru cun atividadi de cunferentzia de is capugrupus, chi funt a s'art. in fatu, n°14 de custu istatutu.
4. Onnia consillieri depit scioberai un domiciliu in su territòriu comunali a ui depint essi mandaus is avisus de cunvocatzioni de su consillu e onnia atera comunicatzioni ufiziali.

## Art. 15

### Grupus consillaris

1. Is consillieris si podint constitui in grupus, segundu cantu prividiu in su Regulamentu de su Consillu Comunali e ndi donant comunicatzioni a su sindigu e a su segretàriu comunali in pari a su inditu de su nomini de su capugrupu. Casu mai non si esercitit tali facultadi o in is moras de sa disinniatzioni, is grupus funt individuauus in is listas chi si funt presentadas a is eletzionis e a is pròpius capugrupus in is consillieris, chi non faint parti de sa giunta, chi apiant tentu su numeru prus mannu de preferentzias;
2. is consillieris comunalis podint constitui grupus non correspondentis a is listas eletoralis innui funt istetius eligius bastit chi talis grupus ant a resultai fatus de assumancu tres membrus;
3. Is capugrupus consillaris funt domiciliaus avatu s'impiegau addetu a s'ufiziu protocollu de su Comunu ;
4. A is capugrupus consillaris est permitiu teni, a debadas, una copia de sa documentatzioni chi pretocant is autus chi serbint a su sboddicamentu de su pròpiu mandau ;
5. Is grupus consillaris, tenint diritu a s'atobiai a pari in unu aposentu comunali postu a dispositzioni, po custu motivu, dae su sindigu.

## Art. 16

### Sìndigu

1. Su sìndigu est eligiu deretamenti dae is tzitadinus segundu su modu istabilius in sa lei chi disciplinat puru is casus de ineligibilitadi, de incompatibilitadi, su istadu giuridicu e is curpas de s'acabu de sa càrriga.
2. Issu rapresentat su Comunu e est s'organu responsàbili de s'amministratzioni, subraintendit a is verifegas de resultau unidas a pari a su funtzionamentu de is serbìtzius comunalis, donat diretivas a su segretàriu comunali, a su diretore, chi est nominau, e a is responsàbilis de is ufizius in ordini a is indiritzus amministrativus e gestionalis, e aici puru a suba s'esecuzioni de is autus;
3. Su sìndigu esercitat is funtzionis donadas a cussu dae sa lei, dae su istatutu, dae is regulamentus e subraintendit a su sboddicamentu de is funtzionis istatalis o regionalis atribuidas a su Comunu. Issu tenit puru cumpetèntzia e possas de indiritzu, de vigilantzia e controllu de s'atividadi de is assessoris e de is istruturas gestionalis e esecutivas.
4. Su sìndigu, a suba is indiritzus istabilius dae su consillu, providit a sa nomina, a su desinnamentu e a sa revoca de is rapresentantis de su Comunu avatu entis, aziendas e istituzionis.
5. Su sìndigu est puru cumpetenti, a suba is indiritzus naus dae su Consillu Comunali, in s'ambitu de is criterius ingitau dae sa Regioni, e ascurtadas is categorias interessadas a coordinai s'orariu de is esercitzius commercialis, de is pùblicos exercitzius e de is serbìtzius pùblicos, e aici puru, fatu chi siat un acordiu cun is responsàbilis territorialmenti cumpetentis de is amministratzionis interessadas, de s'orariu de apertura a su pùblicu de is ufizius pùblicos postus in su territòriu, cunsiderendi is abbisongius de is diversas fascias de populatzioni interessadas, cun particolari reguardu a is abbisongius de sa genti chi traballat.
6. A su sìndigu, in prus a is cumpetèntzias de lei, funt assinnadas dae custu istatutu e dae is regulamentus atribuzionis cali organu de amministratzioni, de vigilantzia e is possas de autorganizzazioni de is cumpetèntzia chi faint parti a s'ufiziu.

## Art. 17

### Atribuzionis de amministratzioni

1. Su sìndigu tenit sa rapresentantzia generali de s'Enti, podit delegai is funtzionis suas o parti de cussas a omnia assessori e est organu responsàbili de s'amministratzioni de su Comunu. In particolari su Sìndigu:
  - a) dirigit e coordinat s'atividadi politica e amministrativa de su Comunu, e fintzas puru s'atividadi de sa Giunta e de is assessoris a solus;
  - b) promovit e assuntat iniziativa po acabai acordius de programma cun totus i sugetus pùblicos prividius dae sa lei ascutau su Consillu Comunali;
  - c) cunvocat is cumitzius po is referendum prividius dae s'art.6 de sa Lei n°142/90,e s.m. e i.;
  - d) adotat is ordinantzias chi podint cuntessi e apretosas prividias dae sa lei;
  - e) nominat su segretàriu comunali, scioberendiddu in s'albu fatu aposta;
  - f) donat cunferimentu e revocat a su segretàriu comunali, chi ddu creit cumbeniosu e fata chi siat sa delibera de sa giunta comunali, is funtzionis de diretore generali chi a bortas no bengiat fata una conventzioni cun aterus comunus po sa nomina de su diretore;
  - g) nominat is responsàbilis de is ufizius e de is serbìtzius, donat incàrrigus dirigenzialis e cussus de collaborazioni allena, a suba is abbisongius efetivus e verificabilis.

## Art. 18

### Atributzionis de vigilantzia

1. Su sindigu in s'esercitziu de is funtzionis suas de vigilantzia coberat diretamenti avatu totus is ufizius e serbitzius is informatzionis e is autus, fintzas reservaus, e podit disponi de coberai autus, documentus e informatzionis avatu is aziendas ispetzialis, is istituzionis e is sotziedadis po atzionis, chi faint parti de s'enti, po mesu de is rapresentantis legalis de is pròpias, fadendiddu iscriri a su Consilu Comunali.
2. Issu fait is autus chi allogant is diritus de su Comunu e promovit, diretamenti o giuaendisidda de su segretàriu comunali o de su diretori chi nominau, is ispricullus e is berificas amministrativas a suba totu s'atividadis de sa Giunta.
3. Su sindigu promovit a assumtat iniziativas deretas a assegurai chi is ufizius, serbitzius, aziendas spetzialis, istituzionis e sotziedadis, chi faint parti a su Comunu, sboddiant is atividadis insoru segundu is bideas inditadas dae su Consillu e chi andant paris a is indirizus atuativus naus dae sa Giunta.

## Art. 19

### Atributzionis de organizazioni

1. Su sindigu in s'esercitziu de is funtzionis suas de organizazioni:
  - a) istabilit is chistionis a s'ordini de sa dì de is setzidas de su Consillu Comunali, ndi disponit sa cunvocazioni e ddu presentziat. Acudit a sa cunvocazioni candu sa pregonta est fata dae un cuintu de is consillaris;
  - b) Esercitat is possas de polizia in is atòbius consillaris e in is organismus pùblicos de partecipazioni popolari, dae su sindigu presentziaus, a intru a cantu nau dae sa lei;
  - c) Proponit chistionis po sa giunta, ndi disponit sa cunvocazioni e dda presentziat;
  - d) Ricidit is interrogazioni e is motzionis de portai a su Consillu in cantu cumpetèntzia consillari.

## Art. 20

### Vicesindigu

1. Su vicesindigu nominau tali dae su sindigu est s'assessori chi tenit sa delega generali po sa pratiga de totus i funtzionis de su sindigu, in casu de ausentzia o de istrobu de custu urtimu.
2. S' incàrriga de is delegas lassadas a is assessoris depit essi comunicadas a su Consillu e a is organus prividius dae sa lei, e fintzas puru apicau in pùblicu in s'albu pretoriu.

## Art. 21

### De comenti est fata sa Giunta Comunali

1. Sa Giunta est fata dae su sindigu e dae cuatru consillaris, e unu de custu est ammantau de sa càrriga de vicesindigu.

2. Is assessoris funt scioberaus in mesu a is consilleris.

## Art. 22

### Nomina

1. Su vicesìndigu e is aterus chi faint parti de sa giunta funt nominau dae su sindìgu e presentaus a su Consillu Comunali in prima setzida apustis a is eletzionis.
2. Su sindìgu podit revocai unu o prus assessoris donendindi unu comunicau motivau a su Consillu e depit cambiai intru is 30 diis is assessoris dimissionarius;
3. Is motivus de incompatibilitadi, sa positzioni e su istadu giuridicu de is assessoris e fintzas puru is istitudus de sa decadentzia e de sa revoca funt disciplinaus dae sa lei; non podint comenti si siat fai parti de sa giunta cussus chi siant intra insoru o cun su sindìgu funt imparentaus intru de su tertzu gradu, chi tengiant afinidadi de primu gradu, de afiliatzioni e sa pobidda o pobiddu.
4. Foras de in casus de revoca dae parti de su sindìgu sa giunta abarrat in càrriga fintzas a sa dì de su proclamu de is eligius in occasioni de su renou de su Consillu Comunali.

## Art. 23

### De comenti funtzionat sa giunta

1. Sa giunta est cunvocada e presidia dae su sindìgu, chi coordinat e controllat su traballu de is assessoris e istabilit s'ordini de sa dì de is atòbiu, puru tenendi contu de is chistionis postus in antis dae onnia assessori.
2. Su modu de cunvocatzioni e su funtzionamentu de sa giunta funt istabilidas in manera informali dae sa pròpia.
3. Is setzidas balint chi ddui funt 3 de is chi faint parti e is delìberas funt adotadas a maggiorantzia de is chi nci funt.

## Art. 24

### Cumpetènzias

1. Sa giunta traballat in manera collegiali, donat atuatzioni a is inditus generalis naus dae su consillu e sboddiat atividadi propositiva e de impellida avatu a su pròpiu.
2. Sa giunta, in mesu a totu, in su esercitziu de is funtzionis suas organizativas:
  - a) proponit a su consillu is regulamentus;
  - b) aprovat is progetus, is programmas esecutivus e totus is provedimenu chi cumportant assuntus de ispesa a suba su istantziamentu de bilanciù e chi non siant reserbaus dae sa lei o dae su regulamentu de cuntabilitadi a is responsàbilis de i serbìtzius comunalis;
  - c) elaborat lineas de indiritzu e aprontat is propostas de provedimentus de poni a is determinatzionis de su consillu;
  - d) assuntat atividadis de iniziativa, de impellida e de racordu cun is organus de partecipazioni e dicentramentu;
  - e) cambiat tarifas, mentris elaborat e proponit a su consillu is criterius po sa determina de cussas novas;

- f) nominat i membrus de is commissionis po is cuncursus pùblicus po proposta de su responsàbili de su serbìtziu interessau;
- g) proponit is criterius generalis po sa cuncessioni de suventzionis, cuntributus, sussidius e bantagius economicus de onnia tipu a entis e personis;
- h) aprovat is regulamentus de s'ordinamentu de is ufitzius e de is serbìtzios in su respetu de is criterius generalis istabilius dae su consillu;
- i) disponit s'acetatzioni o su refudu de lassas e donatzionis;
- j) fissat sa dì de cunvocatzioni de is cumitzios po is referendum e fait s'ufitziu comunali po is eletzioni, chi a custu est torrau a poni s'acertamentu de sa regularidadi de su procedimentu;
- k) esercitat, basciu sa determinatzioni de is gastus e individuatzioni de is ainas, funtzionis delegadas dae sa provìntzia, regioni e istadu candu no espressamenti atribuidas dae sa lei e dae su istatutu a ateru organu;
- l) decidit in ordini a is iscontrorius a suba is cumpetèntzias funtzionalis chi iant a podi nasci intra is organus gestionalis de s'enti;
- m) fissat, segundu is regulamentus e is acordius dicentraus, is parametrus, is istandard e is carrigus funtzionalis de traballu po misurai sa produtividadi de s'aparau, intendiu su diretori generali;
- n) determinat, intendius is revisoris de is contus, is misuradoris e is modellus de rilevamentu de controllu internu de manixu segundu is principius istabilius dae su consillu ;
- o) aprovat su Pianu Operativu de Gestioni po proposta de su diretori generali.

## TITULU III

### Istitutus de partitzipatzioni e diritus de is tzitadinus

#### Capudu I

#### Partitzipatzioni e dicentramentu

##### Art. 25

##### Partitzipatzioni populari

1. Su Comunu promovit e tutelat sa partitzipatzioni de is tzitadinus, a solus o associaus, a s'amministratzioni de s'Enti po ndi assecurai sa bona andata, s'impartzialidadi e sa trasparentzia.
2. Sa partitzipatzioni populari s'esprimit cun s'intzentivatzioni de is formas assotziativas e de bolontariau o comitaus e su diritu de is tzitadinus a solus a interbeni in su procedimentu amministrativu.
3. Su Consillu Comunali aprontat e aprovat unu regulamentu innui benint definius sa manera de comenti is tzitadinus podint bali is diritus e is prerogativas prividas dae custu titulu.

## Capudu II

### Assotziatzionismu e bolontariau

#### Art. 26

##### Assotziatzionismu

1. Su Comunu reconnoscit e promovit is formas de assotziatzionismu chi nci funt in su pròpiu territòriu.
2. Po custu, sa Giunta Comunali, a istàntzia de is interessadas, registrat is assotziatzionis chi traballant in su territòriu comunali, ingunis incluju puru is setzionis localis de assotziatzionis a rilevantzia subacomunali.
3. Po ndi teni sa registratzioni tocat chi s'assotziatzioni lassit in Comunu una copia de su istatutu e fatzat isciri sa sedi e su nomini de su rapresentanti legali.
4. No est amitiu su reconnoscentu de assotziatzionis segretas o chi tengiant carateristicas non compatibilis cun is indirtzus generalis naus dae sa Costitutzioni, dae is normas chi nci funt immoi e dae custu Istatutu.
5. Is assotziatzionis registradas depint mostai a s'annu su bilanciù in soru.
6. Su Comunu podit promuovi e istituiri sa consulta de is assotziatzionis.

#### Art. 27

##### Diritus de is assotziatzionis

1. Onnia assotziatzioni registrada tenit diritu, po mesu de su rapresentanti legali o unu delegau suu, de biri is datus chi funt in possa a s'amministratzioni o de essi consultada, candu pedida, avatu a is iniziativas de s'Enti in su setori innui issa traballat.
2. Is scioberus dae s'amministratzioni chi tocant s'atividadis de is assotziatzionis depint essi sighidas dae su coberu de su chi nant is organus collegialis de is pròpias.
3. Su chi ant detzidiu depit arribai a s'Enti in su tempus nau in sa pregonta, chi in onnia casu no depint essi prus pagu de dexi diis.

#### Art. 28

##### Cuntributus a is assotziatzionis

1. Su Comunu podit sbossai a is assotziatzionis foras che is partius politicus, cuntributus economicus de destinai a su sboddiamentu de sa actividadis assotziativa.
2. Su Comunu podit, aici puru, poni a dispositzioni de is assotziatzionis, nomanadas in su comma chi beniat prima, a titulu de cuntributu in natura, istruturas, benis o serbìtzius a debadas.
3. Su modu po donai is cuntributus o de gosu de is struturas, benis opuru serbìtzius de su enti est istabilida in unu regulamentu fatu aposta, po garantiri a totus is assotziatzionis paris oportunitadi.
4. Su Comunu podit manixai serbìtzius traballendi in pari cun is assotziatzionis de bolontariau reconotas in totu sa nazioni e chi funt in su albu regionali apositu, su donai is cuntributus e su modu de traballai in pari ant essi istabilidas in su regulamentu apositu.
5. Is assotziatzionis chi ant riciu cuntributus in dinai o in natura dae su Enti depint fai a acabbu de s'annu unu torracontu chi ndi fatzat isceraì comentis est stetiù spendiu.

## Art. 29

### Bolontariau

1. Su Comunu promovit formas de bolontariau po fai partecipai sa populazzioni in atividadis deretas a su melloramentu de sa calidadi de sa vida de sa personi, tzivili e sotziali, in particulari de cussas cantu genti sempiri in s' riscu de essi lassaus a una parti, e fintzas puru po sa tutela de s' ambienti.
2. Su bolontariau at a podi nai su chi pensat a suba is bilancius e is programmas de su enti, e traballat in pari a is progetus, istrategias, istùdius e sperimentus.
3. Su Comunu assegurat chi is prestazzionis de atividadi bolontarias e a debadas in su interesu de totus e cretias de importantzia generali tengiant is metzus chi abbisongiant po sa mellus renescia insoru e siant tuteladas po non si ingolli in su traballu.

## Capudu III

### Su modu po partitzipai

## Art. 30

### Consultazzionis

3. S' amministratzioni comunali podit indici consultazzionis de sa populazzioni po coberai su chi pensant e is propostas a suba s'atividadi amministrativa.
4. Is formas de custas consultazzionis funt istabilidas in su regulamentu fatu apostata.

## Art. 31

### Peditzioni

1. Chi si siat, residenti in su territòriu comunali, podit peliai, in forma colletiva, a is organus de sa Amministratzioni su intèrbentu a suba chistionis de interessu comunu o po mostai is abbisongius de natura colletiva.
2. Sa ragota de cussus chi ndi bolint addiriri podit cuntessi sena formalidadi ispecifica a su acabu de su testu innui faint parti is pregontas deretas a sa Amministratzioni.
3. Sa peditzioni est mandada a su s'indigu chi, intru is 15 diis, dda assinnat in examini a su organu cumpetenti e ndi mandat copia a is grupus chi ddui funt in consillu comunali.
4. Chi sa peditzioni est sutascrita de asumancu 50 personis, s'organu cumpetenti si depit pronunziai po cussa intru is 30 diis dae su ricimentu.
5. Su chi ddui est in sa detzisioni de su organu cumpetenti, cun su testu de sa peditzioni, est publicau cun apicu in is logus apostata e, comentu si siat, in manera tali de permiti sa connoscentzia a totus chi ant firmau residentis in su comunu.
6. Chi sa peditzioni est sutascrita dae asumancu 50 personis, donnia consilleri podit pediri cun aposita istàntzia chi su testu de sa peditzioni siat postu in chistioni in sa setzida chi benit de su consillu comunali, de convocai intru is trinta diis.

## Art. 32

### Propostas

1. Chi unus cantu eletoris de su comunu, no prus pagu de 50, pongiat in antis a su s'indigu propostas po sa adotzioni de autus amministrativus de cumpetèntzia de su enti e custas propostas siant abbastantzia precisas in modu de non lassai dudas a suba sa natura de s' autu e su chi ddui est iscritu in su dispositivu, su s'indigu, tentu is parris dae is responsàbilis de is serbìtzis interessaus e dae su segratariu comunali, trasmitit sa proposta cun is parris de s'organu cumpetenti e a is grupus presentis in su consillu comunali intru de is 30 diis dae sa recida.
2. S'organu cumpetenti podit ascurtai is chi ant propostu e depit adotai is determinas suas in bia formali intru is 30 diis dae sa recida de sa proposta.
3. Is determinas de su comma de acoa funt publicadas in is logus apostas e funt comunicadas formalmenti a is primus tres firmatarius de sa proposta.

## Art. 33

### Referendum

1. Unu numeru de eletoris residentis non prus pagu de su 20% de is iscritus in is listas elettoralis podint pedit chi bengiant indicium referendum in totus is materias de cumpetèntzia comunali.
2. Non podint essi indicium referendum in materia de tributis localis e de tarifas, de atividadi amministrativas vincoladas dae sa lei istatali o regionali e candu a suba sa matessi chistioni est giai indicium referendum in is urtimis cincu annus. Funt puru lassadas fora dae sa podastadi referendariis materia chi s'ghint:
  - a) su istatutu comunali;
  - b) regulamentu de su consillu comunali;
  - c) pianu reguladori generali e ainas urbanisticas atuativas ;
3. Sa chistioni dae poni a is eletoris depit essi de cumprendoniu lestu e tali de non fai fai isballius.
4. Funt ammittias preguntas de referendum puru in ordini a s'ogetu de autus amministrativus giai aprovaus dae is organus cumpetentis de su comunu, fora de cussus deretus a is materias de su comma 3 nau acoa.
5. Su consillu comunali aprovat unu regulamentu innui benint istabilidas is proceduras po s'ammissioni, po is modus de ragorta de is firmas, su sboddiamentu de is consultatzionis, sa balidadadi insoru e su proclamau de su risultau.
6. Su consillu comunali depit pigai autu de su risultau e pigai provedimentus cun autu fomali in menescimentu a su ogetu de sa pròpia.
7. Non si andat in antis a su cromptentu de su comma de acoa chi non at partecipau a is consultatzionis asumancu sa metadi prus unu de is chi tenint diritu.
8. Su recimentu mancau de is inditud aprovaus dae is tzitadinus in sa consultatzioni referendaria depit essi adequatamenti motivau e deliberau dae sa magiorantzia assoluta de is consilleris comunalis.
9. Chi in casu sa proposta, posta a referendum, siat aprovat dae sa magiorantzia assoluta de is chi tenint diritu a su votu, su consillu comunali e sa giunta non podint pigai decisionis scontroriatas cun cussa.

## Art. 34

### Sa intrada a biri is autus

1. Donnia tzitadinu tenit libera intrada a consultai is autus de s'amministratzioni comunali e de is sugetus, puru privaus, chi manigiant serbitzius pùblicus.
2. Podint essi leaus a sa consultatzioni sceti is autus chi craras dispositzionis legislativas decrarant reservaus o postus a limiti de fai connosci.
3. Sa consultatzioni de is autus de su primmu comma, depit cuntessi sena particolari fomalidadi cun pregonta motivada de s'interessau, in is tempus istabilius dae su regulamentu apositu.
4. In casu de nega dae parti de su impiegau o funtzionariu chi tenit s'antu s'interessau podit torrai a fai sa pregonta po iscritu a su sindigu de su comunu, chi depit comunicai is pròpias determinas in minescimentu intru de is 30 diis dae sa ricida de sa pregonta etotu.
5. In casu de nega depint essi citaus a craru is articulus de lei chi non lassant fai a isciri s'antu pediu.
6. Su regulamentu istabillit is tempus e sa manera po s'esercitziu de is diritus prividius in custu articulu .

## Art. 35

### Diritu de informatzioni

1. Totus is autus de s'amministratzioni, foras de cussus chi portant su recidori determinau, funt pùblicus e depint essi adequatamenti publicizaus.
2. Sa publicatzioni cuntessit, de norma, cun apicu in su logu apostu, facili de brintai po totus, postu a s'intrada de su palazu comunali e cun inditus de su sindigu in logus apostu, destinaus a custu, postus in is bias e in is pratzas.
3. S'apicu benint atendiu dae su segretàriu comunali chi si serbit de unu missu e, cun atestatzioni de custu, certificat sa publicatzioni cuntessida.
4. Is autus cun recidori determinau depint essi notificaus a s'interessau.
5. Is ordinantzias, is cunferimentus de cuntributus a entis e associaztionis depint essi publicizadas cun apicu.
6. E in prus, po is autus prus importantis, isceraus in su regulamentu, depit essi dispostu s'apicu in logus publicitarius e onnia ateru metzu chi abbisongiada po ndi donai oportunu ispargimentu.

## Art. 36

### Istanzias

1. Chi si siat, a solu o associaiu, podi parai a su sindigu interrogatzionis in minescimenu a problemas specificus o facis de s'atividadi amministrativa.
2. Sa sceda a s'interrogatzioni depit essi motivada e frunida intru de is 30 diis dae s'interrogatzioni.

## Capudu IV

# Su defensori tzìvicu

### Art. 37

#### Nomina

1. Su defensori tzìvicu est nominau dae su consillu comunali, fora chi siat iscioberau in forma de cunventzionamentu cun aterus comunus o cun sa provìntzia de Aristanis, a iscrutiniu secretu e a maggiorantzia de duus de tres de is consilleris.
2. Onnia tzitadinu chi apat is rechisius de custu articulu podit fai arribai sa pròpia candidadura a s'amministratzioni comunali chi ndi ammanigiat apositu elencu basciu ai fatu su controllu de is rechisius.
3. Sa desinnatzioni de su defensori tzìvicu depit cuntessi intra is personis chi, po preparazioni e esperientzia donint garanzia manna de indipendentzia, su beni acostumau e sa cumpetèntzia giuridicu-amministrativa e siant in possa de su diploma de laurea in iscentzias politicas, giurisprudenzia, economia e commerciu o de sa matessi ispetzia.
4. Su defensori tzìvicu abarrat in càrriga cantu su consillu chi ddu at iligiu e sboddiat is funtzionis suas fintzas a su insediamentu de su chi benit in fatu.
5. Non podit essi nominau defensori tzìvicu:
  - a) chi si agatat in cunditionis de ineligibilitadi a sa càrriga de consilleri comunali;
  - b) is parlamentaris, is consilleris regionalis, provintzialis e comunalis, is chi faint parti de is cunsortzius intra is comunus e de is comunidadi montanas, is chi faint parti de su comitau regionali de controllu, is ministrus de su cultu e is partius politicus;
  - c) is dependentis de su comunu, is amministradoris e is dependentis de personis giuridicas, entis, istitutus e azindas chi apant raportus cuntraturalis cun s'amministratzioni comunali o chi riciant dae cussa cali si siat titulu suventzionis o cuntributus ;
  - d) chi frunit prestazioni de traballu autonomu a s'amministratzioni comunali,
  - e) chi siat coiau a o tengiat raportu de parentau o afinidadi intru de su quartu gradu cun amministradoris de su comunu, dependentis suos o su segretàriu comunali.

### Art. 38

#### Decadentzia

1. Su defensori tzìvicu ruit dae su incàrrigu chi bengiat desuncunas cunditionis chi ndi iant a istrobbai sa nomina o chi manigiat in manera privada causas chi pretocant s'amministratzioni comunali.
2. Sa decadentzia est pronunziada dae su consillu comunali.
3. Su defensori tzìvicu podit essi revocau dae s'incàrrigu po gravis motivus cun delibera pigada a maggiorantzia de duus de tres de is cunsilleris.
4. In ipotesis de cambiù, po revoca, decadentzia o dimissionis, primu chi acabbit sa fini naturali de s'incàrrigu, at a essi su consillu comunali a provvidi.

## Art. 39

### Funtzionis

1. Su defensori tzìvicu tenit s' assuntu de interbenni avatu is organus e ufitzius de su comunu po garantiri su poni in menti de custu istatutu e de is regulamentus comunalis, fintzas puru su respetu de is diritus de is tzitadinus ialianus e istrangius.
2. Su defensori tzìvicu depit interbenni su rechesta de is interessaus e po iniziativa pròpia onnia borta chi creit siat violada sa lei, su istatutu o su regulamentu
3. Su defensori tzìvicu depit providi fintzas a candu sa violatzioni, po cantu est possibili, bengiat sperdida e podit donai consillu e inditus a sa parti ofendia fintzas a candu sa pròpia potzat amparai is pròpius diritus e interessus in is formas de lei.
4. Su defensori tzìvicu depit puru castiai a manera chi a totus is tzitadinus siant reconnotus is pròpius diritus.
5. Su defensori tzìvicu depit garantiri su pròpiu interessamentu chi cumbengiat a chi si siat andit a che cussu; issu depit essi disponibili po su pùblicu in s'ufitziu suu asumancu una dì a sa cida.
6. Su defensori tzìvicu esercitat su cuntrollu de is delìberas comunali a s'art. 17, comma 38 de sa lei 15 maju de su 1997 n°127 segundu sa manera prividias dae s'art.17, comma 39, de s'urtima lei remonada.

## Art. 40

### Facultadi e prerogativas

1. S'ufitziu de su defensori tzìvicu tenit sedi in logu afatenti postu a dispositzioni de s'amministratzioni comunali, cun is serbìtzius e is ainas chi abbisongiant po su sboddiamentu de su incàrrigu.
2. Su defensori tzìvicu in su esercitziu de su mandau suu podit consultai is autus e is paperis in possa de s'amministratzioni comunali e de is concessionarius de pùblicus serbìtzius.
3. Issu, in prus, podit tzerriai a pari su responsàbili de su serbìtziu interessau e ddi pediri paperis, novas, crarimentus sena chi potzat essi postu su secretu de ufitziu.
4. Su defensori tzìvicu relatat intru de is trinta diis s'acabu de su chi at fatu a boxi o po iscritu, a su tzitadinu chi dd'at pediu su interbentu e sinnedat a is organus comunalis o a sa magistradura is cosas chi non funtzionant, is illegitimidadis o is ritardus berificaus.
5. Su defensori tzìvicu podit a su pròpiu cumbidai s'organu cumpetenti a adotai autus amministrativus chi creit chi cumbengiant, cuncordendindi in s'eventualidadi cussu de iscriri.
6. Est facultadi de su defensori tzìvicu, cali garanti de sa imparzialidadi e de andamentu bonu de is atividadis de sa p.a. de presentzias, sena diritu de votu o de interbentu, a is setzidas publicas de is commissionis de cuncursu, astas pùblicas, licitatzionis privadas, apaltus cuncursu. Po cussu depit essi informau de sa dì de custus atòbius.

## Art. 41

### Relata annuali

1. Su defensori tzìvicu presentat onnia annu, intru de su mesi de martzu, sa relata de s'atividadì fata in s'annu passau, mostendi is casus sighius, is cosas chi no ant funtzionau, is ritardus e is illegitimidadis berificadas e formulendi is cunsillus chi creit chi cumbengiant po ddas isperdi.
2. Su defensori tzìvicu in sa relata chi a su primu comma, podit puru inditai propositas deretas a melliorai su funtzionamentu de s'atividadì amministrativa e s'eficientzia de is serbìtzius pùblicus, e fintzas puru a garantiri s'impartzialidadi de is decisionis.
3. Sa relata depit essi apicada a s'albu pretoriu, trasmitia a totus is consilleris comunalis e posta in chistioni intru is 30 diis in su consillu comunali.
4. Totus is bortas chi si reconnoscat s'ocasioni, su defensori tzìvicu podit sinnalai casus a solus o chistionis a su s'indigu, fintzas a candu s'iant batalladas in su consillu comunali, chi depit essi cunvocada intru is 30 diis.

## Art. 42

### Indennidadi de funtzioni

1. A su defensori tzìvicu est currispondia un'indennidadi de funtzioni chi s'importu est carculau a s'annu dae su consillu comunali.

## Capudu V

### **Su Procedimentu amministrativu**

## Art. 43

### Diritu de interbentu in is procedimentus

1. Chi si siat betidori de unu diritu o de unu interessu legittimu chi tenit a che fai in unu procedimentu amministrativu tenit facultadi de interbeni, foras chi in is casus a craru previdius dae sa lei o dae su regulamentu.
2. S'Amministratzioni comunali depi fai pùblicu su nomini de su funtzionariu responsàbili de sa procedura, de cuddu chi depit adotai is decisionis in minescimentu e su termini anca is decisionis depit essi adotadas.

## Art. 44

### Procedimentus a istantzia de parti

1. Dependi acuntessi is procedimentus a istantzia de parti, su sugetu chi at parau s'istantzia podit pediri de essi intendiu dae su funtzionariu o dae s'amministradori chi si depit pronuntzai in minescimentu.
2. Su funtzionariu o s'amministradori depint intendi s'interessau intru is 30 diis dae sa pregunta o in su termini prus pitu istabiliu dae su regulamentu.
3. Po onnia istantzia dereta a teni sa bogadura de unu autu o provedimentu amministrativu depit essi donada una sceda oportuna po iscritu in su terimini istabiliu dae su regulamentu, e coment si siat non prus de is 30 diis.
4. Dependi acuntessi ca s'auto o su provedimentu pregontau potzat ferri mali su diritu o is interessus legitimus de aterus sugetus, su funtzionariu responsàbili ddis depit donai comunica de sa pregonta ricida.
5. Custus sugetus podint mandai a s'amministratzioni istantzias, memorias, propositas o fai documentus intru de is 15 diis dae sa ricida de sa comunica.

## Art. 45

### Procedimentus a impellida de ufitziu

1. Dependi acuntessi is procedimentus a impellida de ufitziu, su funtzionariu responsàbili ndi depit donai comunica a is sugetus chi avatu a cussus su provedimentu finali est destinau a produxi efetus deretus e a cussus chi po lei depint interbeni e coment si siat a is sugetus individuaus in s'art.7 de sa lei 241/90, chi funt betidoris de diritus o interessus legitimus chi potzant essi noxius dae s'adotzioni de s'auto amministrativu, inditendi su termini non prus pagu de is 15 diis, fora de is fatus de particulari acoitu isceraus dae su regulamentu, a ui is interessaus podint presentai istantzias, memorias, propositas o produxi documentus.
2. Is sugetus interessaus podint, fintzas puru in su matessi termini, pediri de essi intendius de personi dae su funtzionariu responsàbili o dae s'amministradori chi si depit pronuntzai in mineximentu.
3. Chi po un' iaxi de interessaus siat in manera particulari gravosa sa comunica personali de su primu comma, est permiu a dda iscambiai cun sa publicatzioni segundu s'art.35 de su istatutu.

## Art. 46

### Sa determina de su chi ddui est in s'auto

1. In is fatus previdius dae is duus articulus naus a coa, est sempiri chi siant istetias in manera puntuali sighidas is proceduras ingunis prividias, su chi ddui est de boffiu in s'auto podit resultai dae un' acordiu intra de su sugetu privau interessau e su funtzionariu responsàbili.
2. Po custu abisongiat chi de custu acordiu siat donau atu in sa premessa e ca su chi ddui est a intru d'acordiu etotu siat, coment si siat, a sa manera de garantiri su pùblicu interessu e impartzialidadi de s'amministratzioni.

# TITULU IV

## ATIVIDADI AMMINISTRATIVA

### Art. 47

#### Is impunnas de s'atividadi amministrativa

1. Su Comunu cunfrommat sa pròpia atividadi amministrativa cun is principius de democratzia, de partecipazioni, de trasparentzia, de efficientzia, de eficacia, de economicidadi e de semplicitadadi de is proceduras.
2. is organus istituzionalis de su Comunu e is dependentis responsàbilis de is serbìtzis depint providi a is istanzias de is interessaus in is modus e in is terminis istabilius dae sa lei, dae custu istitutu e dae is regulementos de atuatzioni.
3. Su Comunu, po acumentai is abisongius de is tzitadinus, atuat is formas de partecipazioni previdias dae custu istatutu, e puru formas de cooperatzioni cun aterus Comunas e cun sa provintzia.

### Art. 48

#### Serbìtzis pùblicos comunalis

1. Su comunu podit istituiri e manixai serbìtzis pùblicos chi apant po ogetu sa produzioni de benis e serbìtzis de atividadis deretas a persighiri finis sotzialis e a promovi su isvilupu economicu e tzìvili de sa comunidadi locali.
2. Is serbìtzis de manixai cun diritu de privativa funt istabilidas dae sa lei.

### Art. 49

#### Formas de manixu de is serbìtzis pùblicos

1. Su consillu comunali podit deliberai s'istituzioni e s'esercitziu de pùblicos serbìtzis in custas formas chi s'inghint:
  - a) in economia, candu po su manniori est de pagu contu o po is carateristicas de su serbìtziu, non siat de abisongiu costituiri un'istituzioni o un'azienda;
  - b) in cuncessioni a aterus candu nei siant ragionis tènicas, economicas e de oportunidadi sotziali.
  - c) Po mesu de aziendis ispetzialis, puru po su manixu de prus de unu serbìtziu de rilevantzia economica e imprenditoriali ;
  - d) Po mesu de istituzioni, po s'esercitziu de is serbìtzis sotzialis sena rilevamtzia imprenditoriali;
  - e) Po mesu de sotziedadis po atzionis o a responsabilidadi limitada cun su de prus a capitali pùblicu, chi incapitat de cumbeni, in relatzioni a sa natura de su serbìtziu dae erogai, su fai parti de aterus sugetus pùblicos e privaus.

- f) Po mesu de conventzionis, cunsortzius, acordius de programma, unionis de is comuns, e puru in onnia atera manera cunsendida dae sa lei.
2. Su comunu podit fai parti a sociedadis po atzionis, cun su de prus a capitali pùblicu po su manixu de is serbitzius chi sa lei non reservat in bia esclusiva a su comunu.
3. Su comunu podit puru donai impellida e fai parti, puru in manera indereta, a atividadis economicas chi andant paris a finis suos istitutzionali, agiudendisidda de is principius e de is ainas de diritu communu.
4. Is possas, foras de su referendum, chi custu istatutu reconnoscat a is tzitadinus avatu is autus de su comunu funt isterrius fintzas a is autus de is aziendas ispecialis, de is istituzionis e de is sotziedadis de capitali a maggiorantzia pùblica.

## Art. 50

### Aziendas ispecialis

1. Su consillu comunali podit deliberai sa costitutzioni de aziendas ispecialis, dotadas de personalidadi giurдика e de autonomia gestionali e imprenditoriali, e ndi aprovat su istatutu.
2. Is aziendas ispecialis cunformant sa atividadi insoru a criteriis de trasparenzia, de eficacia, de efficientzia e de economicidadi e tenint s'obrigu de aparixu finantziariu e economicu de cunseghiri cun s'echilibbriu de is gastus e de is recabus, innia incluiu puru is trasferimentus.
3. Is serbitzius de cumpetèntzia de is aziendas ispecialis podint essi esercitadas fintzas a fora de su territòriu comunali, fata chi siat sa istipulatzioni de acordius po garantiri economicidadi e sa mellus calidadi de is serbitzius.

## Art. 51

### Istrutura de is aziendas ispecialis

1. S' istatutu de is aziendas ispecialis ndi disciplinat s'istrutura, su funtzionamentu, is atividadis e is cuntrollus.
2. Funt organus de is aziendas ispecialis su consillu de amministratzioni, su presidenti, su diretori e su collègiu de revisioni.
3. Su presidenti e is amministradoris de is aziendas ispecialis funt nominaus dae su s'indigu in mesu a sa genti chi tenit rechisius de eligibilitadi a consilleri comunali e chi tenit ispeciali cumpetèntzia tècnica o amministrativa po is istudius fatus, po is funtzionis esercitadas avatu aziendas pùblicas o privadas o po ufizius imbistius.
4. Su diretori est assuntu po pùblicu concursu, fora de is bortasprividias dae su T.U. 2578/25 chi essendiddo si podit andai a in antis a sa tzerriada dereta.
5. Su consillu comunali atendit a sa nomina de su collègiu de is revisoris de is contus, donat su capitali de dotatzioni e determinat is inditus e is finalidadi de s'amministratzioni de is aziendas, innia incluius puru is criteriis generalis po sa determina de is tarifas po su gosu de is benis e de is serbitzius.
6. Su consillu comunali aprovat puru is bilanciis annualis e prusannualis, is programmas e su contu consuntivu de is aziendas ispecialis e esercitat sa vigilantzia a suba su traballu insoru.
7. Is amministradoris de is aziendas ispecialis podint essi revocaus sceti po gravis violatzioni de sa lei, documentada inefficientzia e deformidadi avatu is inditus e a is finalidadi de s'amministratzioni aprovas dae su consillu comunali.

## Art. 52

### Istituzioni

1. Is istituzioni funt organismus instrumentalis de su comunu sena personalidadi giuridica ma dotadas de autonomia gestionali.
2. Funt organus de is istituzioni su consillu de amministratzioni, su presidenti e su diretori.
3. Is organus de s'istituzioni funt nominadas dae su sindigu chi ddus podit revocai po gravis violatzioni de sa lei, po documentada inefficientzia o po deformidadi avatu is inditus e a is finalidadi de s'amministratzioni.
4. Su consillu comunali determinat is inditus o is finalidadi de s'amministratzioni de is istituzioni, innia inclusus puru is criterius generalis po sa determina de is tarifas po su gosu de is benis o serbitzius, aprovat is bilanciis annualis e prusannualis, is programmas e su contu consuntivu e esercitat sa vigilantzia a suba su traballu insoru.
5. Su consillu de amministratzioni providit a sa istituzioni deliberendi in s'ambitu de is finalidadi e de is inditus aprovaus dae su consillu comunali e segundu is modus organizativus e funtzionalis prividias in su regulamentu.
6. Su regulamentu podit puru previdi formas de partecipazioni de is tzitadinus o de is gosadoris a sa gestioni o a su controllu de s'istituzioni.

## Art. 53

### Sociedadi po atzionis o a responsabilitadi limitada

1. Su consillu comunali podit aprovai sa partecipazioni de s'enti a sociedadis po atzionis o a responsabilitadi limitada po sa gestioni de is serbitzius pùblicos, chi incapitat providendi puru a sa istituzioni insoru.
2. Dependi acuntessi de serbitzius pùblicos de a primu importantzia sa partecipazioni de su comunu, impari a cussa de aterus eventualis enti pùblicos, at depi essi a obrigu maggioritaria.
3. S'antu costitutivu, s'istatutu o sa compora de cuotas o atzionis depint essi aprovaus dae su consillu comunali e depit sempiri essi garantida sa rappresentatividadi de is sugetus pùblicos in is organus de amministratzioni.
4. Su comunu scioberat i rapresentantis suos intra is sugetus de ispecifica cumpetentzia tècnica e professionali e in su cuncurri a is autus gestionalis cunsiderat is interessus de is consumidoris e de is gosadoris.
5. Is consilleris comunali non podint essi nominaus in is consillus de amministratzioni de is sociedadis po atzionis o a responsabilitadi limitada.
6. Su sindigu o unu delegau suu fait parti a s'assemblea de is socius in rapresentatzia de s'enti.
7. Su consillu comunali providit a berificai a s'annu s'andada de sa sociedadi po atzionis o a responsabilitadi limitada e a controllai chi su interessu de sa colletividadi siat in manera adecuada tutelau in s'ambitu de s'atividadi esercitada dae sa sociedadi matessi.

## Art. 54

### Cunsortzius

1. Su comunu podit fai parti a sa costituzioni de cunsortzius cun aterus entis localis po sa gestioni associada de unu o prus serbitzius segundu is normas prividias po is aziendas ispecialis in cantu aplicabilis.

2. Po custu su consillu comunali aprovat, a magiorantzia assoluta de is chi ddu cumponint, una cunventzioni segundu s'art. de a coa, cun s'istatutu de su cunsortziu.
3. Sa cunventzioni depit previdiri s'obrigu a càrrigu de su cunsortziu de sa trasmissioni a su comunu de is autus fundamentalis chi ant depi essi publicaus cun sa manera de s'art.38, 2° comma de custu istatutu.
4. Su s'indigu o unu delegau suu fait parti de s'assemblea de su cunsortziu cun responsabilidadi paris a sa cuota de partecipazioni fissada dae sa cunventzioni e dae s'istatutu de su cunsortziu.

## Art. 55

### Acordius de programma

1. Su s'indigu po sa definitzioni e atuatzioni de operas, de interbentus o de programmas de interbentu chi bolint, po totu sa renescia insoru, s'atzioni integrada e coordinada dae su comunu e de aterus sugetus pùblicus, in relatzioni a sa cumpetentzia chi est su de primu o su de prus de su comunu a suba s'opera o a suba is acordius de programma, promovit s'acabu de un'acordiu de programma po assegurai su coordinamentu de is atziones e po ndi determinai is tempus, is modus, su finantziamentu o onnia ateru comprimentu cullegau.
2. S'acordiu de programma, chi cunsistit in su cunsensu de totus impari de su presidenti de sa regioni, de su presidenti de sa provìntzia, de is s'indigus de is amministratzionis pertocadas benit definiu in una cunferentzia aposita chi providit fintzas puru a s'aprovatzioni formali de s'acordiu etotu segundu s'art.27, comma 4, de sa lei de s'8 de lampadas de su 1990 n°142, cambiau dae s'art.17, comma 9, de sa lei n°127/97.
3. Chi s'acordiu benit adotau cun decretu de su presidenti de sa regioni e cumportat cambiamentus de is ainas urbanisticas, su aderiri de su s'indigu a su metessi depit essi ratificada dae su consillu comunali intru de is 30 diis a pena de decadentzia.

## TITULU V

### UFÌTZIUS E PERSONALI

#### CAPUDU I

#### Ufìtzius

## Art. 56

### Princìpius istruturalis e organizativus

1. S'amministratzioni de su comunu si esplicat cun su sighiri de impunnas ispecificas e depit essi improntada a is princìpius in fatu:
  - a) unu cuncordu de su traballu po progetus, impunnas e programmas;

- b) analizu e individuatzioni de is produtivadas e de is carrigus funtzionalis de traballu e de su gradu de eficacia atividadi fata dae onnia elementu de s'aparau;
- c) S'individuatzioni de responsabilidadi a istrintu cullegada a s'ambitu de autonomia decisionali de is suetus;
- d) Su inci passai a in antis in sa separadura cidria de is cumpetenzias in sa pratzidura de su traballu e su cunseghimentu de sa prus manna flessibilitadi de is istruturas e de su personali e de sa prus manna collaboratzioni intra de is ufizius.

## Art. 57

### Organizatzioni de is ufiziu e de su personali

1. Su comunu disciplinat cun autus aposta sa dotatzioni de su personali e, in cunformidadi a is normas de custu istatutu, su concodru de is ufizius e de is serbitzius segundu s'isceru intra de sa funtzioni politica e de cuntrollu atribuida a su consillu comunali, a su sindigu e a sa giunta e funtzioni de gestioni amministrativa atribuida a su direttori generali e a is rappresentantis de is ufizius e de is serbitzius.
2. Is ufizius funt cuncodraus segundu is prìncipius de autonomia, trasparentzia e efficientzia e criterius de funtzionalidadi, economicidadi de gestioni e flessibilitadi de s'istrutura.
3. Is serbitzius e is ufizius operant segundu s'individuatzioni de is abisongius de is tzitadinus, adeguendi cun frimesa sa pròpia atzioni amministrativa e is serbitzius donaus, berifichendindi sa respundentzia a is abisongius e economicidadi.
4. Is orarius de is serbitzius abertus a su pùblichu benint fissaus po su mellus acumentai is abisongius de is tzitadinus.

## Art. 58

### Regulamentu de is ufizius e de is serbitzius

1. Su comunu cun su regulamentu de s'organizatzioni istabilit is normas generalis po su cuncodru e su funzionamentu de is ufizius, e in mesu a totu, is atribuzionis e is responsabilidadi de onnia istrutura organizativa, is raportus intrepai is ufizius e serbitzius e in mesu a custus, su direttori e is organus amministrativus.
2. Is regulamentus si uniformant a su prìncipiu segundu cali a is organus de gunvernu est atribuida sa funtzioni politica de indiritzu e de cuntrollu, intendia cumenti podestadi de stabiliri in prena autonomia impunnadas e finalidadi de s'atzioni amministrativa in onnia setori e de ndi berificai su cunseghimentu; a su direttori e a is funtzionarius responsabilis tocat, po sa sighidura de is impunnadas assinnadas, su incarrigu de definiri, in manera adecuada a is finis istituzionalis, is impunnadas prus operativas e sa gestioni amministrativa, tècnica e cuntabili segundu is prìncipius de professionalidadi e responsabilidadi.
3. Su cuncodru de su comunu si articolat in unidadis operativas chi funt acomunadas, segundu criterius de omogeneidadi, in istruturas a manu a manu prus mannas comenti dispostu dae su regulamentu fatu aposta fintzas cun s'aggiudu de istruturas isghescias o de unus cantu personas de prus setoris.
4. Su comunu regollit e aplicat is acordius colletivus natzionalis aprovaus in is formas de lei e tutelat sa libera organizatzioni sindacali de is dependentis istipulendi cun is rapresentantzias sindacalis is acordius colletivus dicentraus segundu is normas de lei e de cuntratu de immoi.

## Art. 59

### Diritus e doveris de is dipendentis

1. Is dipendentis comunalis, incuadras in is ruolus organicus e ordinaus segundu is categorias e is profilus professionalis in cunformidadi a sa disciplina generali a suba su istadu giuridicu e su tratamentu economicu de su personali istabiliu dae sa lei e dae is acordius colletivus natzionalis, sboddiant s'atividadi insoru a su serbìtziu e in su interessu de is tzitadinus.
2. Onnia dipendenti comunali depit assolvi cun curretesa e de pressi a is incarrigus de cumpetentzia de pròpius ufizius e serbìtzius e, in su respetu de is cumpetentzias de is pròpius ruolus, a lompia is impunnadas assinnadas. Issu est fintzas puru responsàbili avatu su diretori, su responsàbili de is ufizius e de is serbìtzius e s'amministratzioni de is autus fatus e de is resultauns cunsighius in s'esercìtziu de is pròpias funtzionis.
3. Su regulamentu de organizatzioni funtzionamentu de is ufizius e de is serbìtzius determinat is conditzionis e sa manera cun is calis su comunu promovit su perfetzionamentu e s'artziadura professionali de su personali, assegurat conditzionis de traballu bonas a ndi atendi sa saludi e s'interesa psicofisica e garantit una prena e efetiva atividadi de sa libertadi e de is diritus sindacalis.
4. S'aprovu de is ruolus de is tributus e de is cànonis e fintzas puru sa stipula, in rapresentantzia de s'enti, de is cuntratus giai aprovaus, tocat a su personali responsàbili de s'area ognunu po sei e de is serbìtzius difarentis, in su respetu de is direttivas donadas dae su s'indigu, dae su diretori e dae is organus collegialis.
5. Su personali de su comma in antis providit puru a su giai autorizatzionis commercialis, de politzia amministrativa, e fintzas puru autorizatzionis, cuncessionis ediltzias e a sa pronuntzia de is ordinantzias de natura non cuntingibilis e apretosas.
6. Su regulamentu de cuncodru individuatu formas e maneras de manigiu de sa tecnoistutura comunali.

## CAPUDU II

### Personali direttivu

## Art. 60

### Diretori generali

1. Su s'indigu, fata chi siat sa delibera de sa giunta comunali, podit nominai unu diretori generali, foras de sa dotatzioni organica e cun cuntratu a tempus determinau, segundu is criterius istabilius dae su regulamentu de organizatzioni, a pustis ai istipulau una cunventzioni aposta intra is comunus chi is populatzionis aciuntas a pari arribint a is 15 milla abitantis.
2. In custa manera su diretori generali at a depi providi a sa gestioni coordinada o a sola de is serbìtzius intra is comunus pertocaus.

## Art. 61

### Còmputus de su diretori generali

1. Su diretori generali providit a atuai is inditus e is impunnas istabilidas dae is organus de governu de s'enti segundu is diretivas chi, po custu, dd'at donai su s'indigu.
2. Su diretori generali subraintendit a is manigius de is entis s'ighendi livellus otimalis de eficacia e eficientzia intra is responsabilis de serbìtziu chi in s'interis rispundint in s'esercitziu de is funtzionis a insoru assignadas.
3. Sa durada de s'incarrigu non podit essi prus manna de cussa de su mandau eletoralis de su s'indigu chi podit andai a in antis a sa revoca sua fata chi siat sa delibera de sa giunta comunali chi acuntessendi non rennescit a lompi a is impunnas fissadas o candu nascint scontrorius cun is lineas de politica amministrativa de sa giunta, e puru e in onnia borta de gravi oportunitadi.
4. Candu non resultat istipulada sa cunventzioni po su serbìtziu de direzioni generali, is funtzionis suas podint essi cunferidas dae su s'indigu a su segretàriu comunali, intendia sa giunta comunali. (Custu comma balit siat po is comunus cun prus de 15 milla abitantis siat po cussus cun populatzioni prus bascia).

## Art. 62

### Funtzionis de su diretori generali

1. Su diretori generali aprontat sa proposta de pianu esecutivu de gestioni e de su pianu fatu a fini de is impunnas previdiu dae is normas de sa cuntabilidadi, segundu is inditus frunius dae su s'indigu e dae sa giunta comunali.
2. Issu, in mesu a totu, esercitat custas funtzionis:
  - a) aprontat, segundu is diretivas istabilidas dae su s'indigu, programmas organizativus o de atutzioni, relatas o istudius particularis;
  - b) cuncodrat e dirigit su personali, in manera coerenti cun is inditus funzionalis istabilius dae su s'indigu e dae sa giunta;
  - c) berificat s'eficacia e s'eficientzia de s'atividadi de is ufitzius e de su personali a cussus postus in antis;
  - d) promovit is procedimentus disciplinaris avatu de is responsàbilis de is ufitzius e de is serbìtzius e adotat is sanzionis segundu cantu obrigat su regulamentu, in cuncòrdiu cun is previsionis de is cuntratus colletivus de su traballu;
  - e) autorizat is missionis, is prestatzionis de traballu istraordinariu, is cungedus, is p'irmissus de is responsàbilis de is serbìtzius;
  - f) Bogat autus de esecutzioni de is deliberas non demanda a sa cumpetentzia de su s'indigu o de is responsàbilis de is serbìtzius ;
  - g) Manigiat is processus de mobilitadi intrasetorialis de su personali ;
  - h) Torrat a esaminai a s'annu, intendius is responsàbilis de is setoris, s'assetiu organizativu de s'enti e sa distributzioni de s'organicu efetivu, proponendi a sa giunta e a su s'indigu eventualis provedimentus in minescimentu;
  - i) Promovit is procedimentus e adotat, in bia sustitutiva, is autus de cumpetentzia de is responsàbilis de is serbìtzius in is bortas chi siant po pagu tempus ausentis fata chi siat s'istrutoria curada dae su serbìtziu cumpetenti;
  - j) Promovit e aguantat is certus, e tenit sa possa de apaxiai e de patuai.

## Art. 63

### Responsàbilis de is ufizius e de is serbìtzius

1. Is responsàbilis de is ufizius e de is serbìtzius funt individuauus in su regulamentu de organizazioni de is ufizius e de is serbìtzius.
2. Is responsàbilis provedint a cuncodrai is ufizius e is serbìtzius a cussus assignaus segundu is inditus ricius dae su diretori generali chi nominau, est a nai dae su segretàriu e segundu is diretivas donadas dae su sîndigu e dae sa giunta comunali.
3. Issus a intru de is cumpetenzias a cussus assignadas provedint a manigiai atividadi de s'enti e a atuai is inditus e a lompi a is impunnas indicadas dae su diretori, chi nominau, dae su sîndigu e dae sa giunta comunali.

## Art. 64

### Funtzions de is responsàbilis de is ufizius e de is serbìtzius

1. Is responsàbilis de is ufizius e de is serbìtzius istipulant in rapresentantzia de s'enti is cuntratus giai deliberaus, aprovant is ruolus de is tributus e de is cànons, manigiant is proceduras de apaltu e de cuncursu e provedint a is autus de gestioni finantziaria, innia incluiu puru su pigai assutus de ispesa.
2. Issus provedint fintzas puru a donai autorizazioni o cuncessionis e sboddiant puru custas funtzions:
  - a) presiedint is commissionis de gara e de cuncursu, s'assuntant is responsàbilidadi de is procedimentus chi ddus pertocat e proponint a sa giunta su sceberu de is aterus membrus ;
  - b) Faint is atestazioni e certificazioni;
  - c) Bogant comunicas, verbalis, difidas e ogra ateru autu costituenti mosta de giuditziu e de connoscentzia, innia incluiu puru, po esempru, is bandus de gara e is avisus de publicazioni de is ainas urbanisticas;
  - d) Provedint a is atenticas e a is legalitzus;
  - e) Pronuntziant is ordinanzias de isciusciadura de manufatus abusivus e si ndi incurant de s'execuzioni;
  - f) Bogant is ordinanzias de cumandu a pagai de sanzions amministrativas e disponit s'apricazioni de is sanzions aciuntas a intru is diretivas donadas dae su sîndigu ;
  - g) Pronuntziant is ateras ordinanzias prividias dae is normas de lei o de regulamentu foras de cussas de s'art.38 de sa lei n°142/90 ;
  - h) Promovint is procedimentus disciplinaris avatu su personali postu a suta de insoru e adotant is sanzions e is limitis e cun is proceduras prividias dae sa lei e dae su regulamentu ;
  - i) Provedint a donai pronta execuzioni a is delìberas de giunta e de consillu e a is diretivas donadas dae su sîndigu e dae su diretori;
  - j) Faint teni a su diretori, in is terminis de su regulamentu de cuntabilidadi, is elementus po improntai is propostas de su pianu esecutivu de gestioni;
  - k) Autorizant is prestazioni de traballu istraordinariu, is ferias, i recuberus, is missionis de su personali dipendenti segundu is diretivas donadas dae su diretori e dae su sîndigu;
  - l) Cuncedint is licenzias a is obietoris de cuscientzia in serbìtziu in su comunu;
  - m) Rispundint avatu a su diretori generali, de sa mancada sighidura de is impunnas a insoru assignadas.

## Art. 65

### Incarrigus dirigentzialis e de arta ispecializazioni

1. Sa giunta comunali, in is formas, cun i limitis e sa manera prividias dae sa lei, e dae su regulamentu a suba s'ordinamentu de is ufizius e de is serbitzius, podit istabiliri is inditus, is criterius e sa manera po s'assuntzioni de personali dirigentziali o de arta ispecializazioni cun cuntratu a tempus determinau, foras de sa dotatzioni organica a bortas chi intra is dipendentis de s'enti non nci siant analugas professionalidadis;
2. Su sindigu, acuntessendi sa bacantzia de su postu o po gravis motivus podit assinnai, in is formas e cun sa manera prividias dae su regulamentu, sa titularidadi de is ufizius e serbitzius a personali pigaus a traballai cun cuntratu a tempus determinau, segundu s'art.6, comma 4, de sa lei 127/97;
3. is cuntratus a tempus determinau non podint essi cambiau a tempus indeterminau, fora chi non ddu permitint normas de lei fatas aposta.

## Art. 66

### Collaborazioni de foras

1. Su regulamentu podit previdi collaborazioni de foras, chi portant un'arta professionalidadi, cun raportu de traballu autonomu po impunnas determinadas e cun conventzionis a termini.
2. Is normas regulamentaris po su cunferimentu de is incarrigus de collaborazioni a sugetus allenus a s'amministratzioni ndi depint istabiliri sa durada, chi no at podi essi prus manna de sa durada de su programma, e is criterius po sa determina de su tratamentu economicu chi pertocat.

## Art. 66

### Ufizziu de indiritzu e de cuntrollu

1. Su regulamentu podit previdi sa costituzioni de ufizius postus a suta sa dipendetzia dereta de su sindigu, de sa giunta comunali o de is assessoris, po s'esercitziu de is funtzioni de indiritzu e de cuntrollu atribuidas a insoru dae sa lei, costituius dae is dipendentis de s'enti o dae is collaboradoris pigaus a traballai a tempus determinau bastit chi s'enti non siat isconciu e/o non siat in situatzionis istruturadas mancantis segundu s'art.45 de su dlgs n°504/92.

## CAPUDU III

### Su segretàriu comunali

## Art. 68

### Segretàriu comunali

1. Su segretàriu comunali est nominau dae su sìndigu, chi dipendit funtzionalmenti de issu, e est sceberau in s'albu fatu aposta.
2. Su consillu comunali podit aprovai sa istipula de cunvenzioni cun aterus comunus po su manigiu cunsortili de s'ufitzius de su segretàriu comunali.
3. Su istadu giuridicu e su tratamentu economicu de su segretàriu comunali funt istabilius dae sa lei e dae sa cuntratatzioni colletiva.
4. Su segretàriu comunali, in su respetu de is diretivas donadas dae susìndigu, imprestat sa consulentzia giuridica a is organus de su comunu a is consilleris unu po unu e a is ufizius.

## Art. 69

### Funtzionis de su segretàriu comunali

1. Su segretàriu comunali fait parti a is atobius de giunta e de consillu e ndi iscrit is verbalis chi firmat impari a su sìndigu.
2. Su segretàriu comunali podit fai parti a commissionis de istudiu e de traballu a intru de s'enti e, cun autorizazioni de su sìndigu, a cussas de foras; issu, cun pregonta, formulat is parris e espressat apretziamentus de ordini tènicu-giuridicu a su consilliu, a sa giunta, a su sìndigu, a is assessoris e a is consilleris unu po unu.
3. Su segretàriu comunali ricit dae is consilleris is pregontas de trasmissioni de is delìberas de sa giunta sugetas a cuntrollu eventuali de su defensori tzivicu.
4. Issu presidit s'ufitziu comunali po is eletzionis in ocasioni de is consultatzioni popularis e de is referendum e ricit is dimissionis de su sìndigu, de is assessoris o de is consilleris e aici puru is propostas de revoca e sa motzioni de isfiducia.
5. Su segretàriu comunali istipulat is cuntratus de su comunu, innui s'enti est parti, candu no est abisongiosu s'agiudu de unu notaiu, e autenticat is iscrituras privadas e is autus unilaterali in s'interessu de s'enti, e esercitat a sa fini ogna atera funtzioni atribuida dae su istatutu o dae su regulamentu cunferida dae su sìndigu.

## CAPUDU IV

### Sa responsàbilitadi

## Art. 70

### Responsabilitadi avatu su comunu

1. Is amministradoris e is dependentis comunalis depint fai refata a su comunu de is dannus chi ndi bessint dae is violatzionis de is obrigus de serbìtziu.
2. Su sìndigu, su segretàriu comunali, su responsàbili de su serbìtziu chi bengiant a connoscentzia, in manera dereta o po is raportus chi tenint cun is organus prus piticus, chi de fatu donint logu a responsabilitadi segundu su primu comma, ndi depint fai denuntzia a su

procuradori de sa Corti de is Contus, inditendi totus is elementus regortus po sa berificadura de sa responsàbilitadi e sa determina de is dannus.

3. Chi su fatu dannosu fessit nexi de su segretàriu comunali o de unu responsàbili de serbìtziu sa denuntzia est fata dae su sindigu.

## Art. 71

### Responsabilidadi avatu aterus

1. Is amministradoris, su segretàriu, su diretori e is dependentis comunalis chi, in s'esercitziu de is funtzionis insoru donadas dae sa lei e dae is regulamentus, intzimint aterus, po intentu malu o nexi manna, unu dannu non giustu funt a manera personali obrigaus a donai sa rifata.
2. Innui su comunu apat donau a s'ateru su tanti de su dannu intzimi dae s'amministradori, dae su segretàriu o dae su dipendenti si torrat a balli movendisidda contraustus urtimus a norma de s'articulu de a in antis.
3. Sa responsabilidadi personali de s'amministradori, de su segretàriu, de su diretori o de su dipendenti chi no apant respetau is diritus de aterus, nci est siat in is bortas de adotzioni de autus o de faidura de operatzionis, siat in is bortas de omissioni o in su ritardu non iscusau de autus o operatzionis chi s'amministradori o su dipendenti siant obrigaus po lei o po regulamentu.
4. candu sa violatzioni de su diritu siat benida dae is autus o operatzionis de organus collegialis de su comunu, funt responsàbilis, in solidu, su presidenti e is chi faint parti de su collegiu chi ant fatu parti a s'auto o a s'operatzioni. Sa responsabilidadi est escludia po cussus chi apant fatu annotai in su verbali su pròpiu disacordiu.

## Art. 72

### Responsabilidadi de is cuntabilis

1. Su tesoreri e onnia ateru cuntabili chi apat manigiu de dinari de su comunu o siat incarrigau de sa gestioni de is benis comunalis, aici puru chincoi chi si nci ponit in mesu, sena legali autorizatzioni, in su manigiu de dinai de su comunu depit torrai contu de sa gestioni e est sugetu a is responsabilidadis istabilidas in is normas de lei e de su regulamentu.
- 2.

## CAPUDU V

### Finanzia e cuntabiliadi

## Art. 73

### Ordinamentu

1. S'ordinamentu de sa finanzia de su comunu est reservada a sa lei e, in is limitis dae cussa previdius, dae su regulamentu.
2. In s'ambitu de sa finanzia pùblica su comunu est titulari de autonomia finanziaria fundada a suba sa certesa de risorsas pròpias e passadas a cussa.

3. Su comunu, in cunformidadi de is lei de immoi in materia, est fintzas puru titulari de podestadi impositiva autonoma in cosas de impostas, de tassas e de is tarifas, e tenit unu demaniu e patrimoniù cosa suos.

## Art. 74

### Atividadi finantziaria de su comunu

1. Is intradas finantziarias de su comunu funt costituidas dae impostas pròpias, aditzionalis e compartecipatzionis a impostas erarialis e regionalis, ateras intradas pròpias puru de natura patrimoniali, risorsas po investmentus e dae onnia atera intrada istabilida po lei o po regulamentu.
2. is trasferimentus erarialis funt destinaus a garantiri is serbìtzios pùblicos comunali indispensabilis; is intradas fiscalis finantziant is serbìtzios pùblicos cretiu necessarius po su isvilupu de sa comunidadi e integrant sa contributzioni erariali po donai serbìtzio pùblicos indispensabilis.
3. In s'ambitu de is facultadis concedias dae sa lei su comunu istituit, iscancellat e regulamentat, cun delìberas coonsillaris, impostas, tassas e tarifas.
4. Su comunu apricat is impostas tenendi contu de sa capacidadi cuntributiva de is sugetus passivus segundu is principiis de progressividadi istabilius dae sa Costituzioni e apricat is tarifas in manera de pigai a preferu is categorias prus debilis de sa populatzioni.

## Art. 75

### Amministratzioni de is benis comunali

1. Su responsàbili de s'ufitziu incarrigau disponit sa compilatzioni de s'inbentàriu de is benis demanialis e patrimonialis de su comunu dae torrai a castiai a s'annu, e est responsàbili, cun su segretàriu e a su ragioneri de su comunu de s'esatesa de s'inbentàriu, de is aciuntas e modifivas fatas in fatu e de s'alogamentu de is titulus, autus, paperis e iscrituras chi pertocant su patromoniù.
2. Is benis patromonialis comunali non impreaus in pròpiu e non destinaus a funtzionis sotzialis segundu su titulu segundu de custu articulu depint, de regula, essi donaus in afitu; is benis demanialis podint essi cuncedius in usu cun canoni a tarifa determinada dae sa giunta comunali.
3. Is summas chi ndi bessint dae s'alienatzioni de is benis, dae lassas, donatzionis, coberamentus de creditus o, comentis si siat, dae is intradas de investiri a patrimoniù, depint essi impreadas in titulus nominativus de su istadu o po spaciai is passividades onerosas e in su melloramentu de su patrimoniù o in sa renescia de operas pùblicas.

## Art. 76

### Bilanciu comunali

1. S'ordinamentu cuntabili de su comunu est reservau a sa lei de su istadu e, in is limitis dae custa fissaus, a su regulamentu de cuntabilidadi.
2. Sa gestioni finantziaria de su comunu si sboddiat in basi a su bilanciù annuali de previsionis postu a iscritu in terminis de cumpetentzia, deliberau dae su consillu comunali, osservendi is

- printzipiu de s'universalidadi, s'unidadi, s'annualidadi, su berus, de sa publicidadi, de s'integridadi e de s'aparixiu economicu e finantziariu.
3. Su bilanciu e is alligaus preiscritus dae sa lei depint essi postu in iscritu in manera de ndi permiti sa ligidura po programmas, serbitzius e interbentus.
  4. Is minus de ispesa, po essi efficacis, depit portai su vistu de regolaridadi cuntabili atestanti sa pròpia copertura finantziaria dae parti de su responsàbili de su serbitziu finantziariu. Su poni su vistu fait diventai esecutivu s'antu adotau.

## Art. 77

### Su torracontu de sa gestioni

1. Is fatus gestionalis funt postus in ispicu po mesu de sa cuntabilidadi finantziaria e economica mostaus in su torracontu anca ddui fait parti su contu de su bilanciu, su contu economicu e su contu de su patrimoniu.
2. Su torracontu est deliberau dae su consillu comunali intru de su 30 de su mesi de lampadas de s'annu in fatu.
3. Sa giunta comunali alligat a su torracontu una relata de mosta cun sa cali esprimint is valutas de eficacia de s'atzioni fata a suba is resulta pigaus in raportu a is programmas e a is costus tentus, e aici puru sa relata de su collegiu de is revisoris de is contus.